

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA KAKANJ  
Općinsko vijeće**

**Broj:** 01/1-38-Z/24  
**Kakanj,** 29.02.2024. godine

**Z A P I S N I K**  
**sa 38. redovne sjednice Općinskog vijeća održane 29.02.2024. godine (četvrtak)**  
**u sali Općinskog vijeća sa početkom u 11:00 sati**  
**(sažetak zapisnika)**

Predsjedavajući Općinskog vijeća Slaven Katičić je pozdravio prisutne i otvorio 38. redovnu sjednicu Općinskog vijeća.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Mediha Mamelja, Džemal Bećirhodžić, Safet Šahman, Nerma Aliefendić, Omer Musić, Namir Talić, Adis Mrkonjić, Amar Selimović, Izudin Hrusto (naknadno pristupio), Elvir Delibašić (naknadno pristupio) i Kenan Kozlo (**SDA**)

Vinka Aletović, Miroslav Spasojević (naknadno pristupio) i Ahmed Begić (**SDP BiH**)

Sabit Čehajić (**S BiH**)

Dževdet Huskić, Marcela Ravlija i Branko Češljčić (**NS**)

Enver Merdić i Mugdin Gorak (**SBB BiH**)

Armin Bašić i Adnan Čobo (**DF**)

Slaven Katičić (**HDZ BiH**)

Mujo Fafulić - (**nacionalna manjina**)

Zerina Kovač i Fakir Ajdinović (**samostalni vijećnici**)

**Odsutni vijećnici:** Mejrema Purišević i Alen Josipović (**SDA**), Edin Šljivo (**SDP BiH**) i Mirsad Tursum (**samostalni vijećnik**)

Predsjedavajući je konstatovao da je na sjednici u momentu prijave prisutno 22 vijećnika i vijećnica, te su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

**Mirnes Bajtarević**, općinski načelnik

**Emir Zaimović**, sekretar Općinskog vijeća – po ovlaštenju

**Džihad Berbić**, pomoćnik općinskog načelnika za finansije

**Mirza Fazlić**, pomoćnik općinskog načelnika za privredu, urbanizam i zaštitu okoline

**Edin Aliefendić**, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

**Nurudin Hrusto**, pomoćnik općinskog načelnika za civilnu zaštitu

**Mukades Delibašić**, pomoćnik općinskog načelnika za imovinskopravne, geodetske poslove i katastar nekretnina

**Bahrudin Arnaut**, pomoćnik općinskog načelnika za opću upravu radne i zajedničke poslove, lokalnu samoupravu i mjesne zajednice

**Zijad Neimarlija**, direktor Zavoda za planiranje i izgradnju općine Kakanj  
**Mahir Sikira**, šef Stručne službe za poslove Općinskog načelnika

### **Izjave, obrađivači, gosti**

**Senad N. Čišija**, direktor JU „Gradska biblioteka“ Kakanj  
**Mirsada Čaluk i Azra Čišija**, predsjednica UO JU i direktorica JU „Mladost“ Kakanj  
**Samir Husika**, predsjednik UO JU Centar za socijalni rad Kakanj  
**Aldin Čatić**, direktor Udruženja „Razvojni centar općine Kakanj“  
**Sedin Karahodžić**, predsjednik Komisije za utvrđivanje kriterija, postupka, načina davanja i izmjene naziva ulica, trgova...

### **Predstavnici medija**

**NTV IC Kakanj**  
**Radio Kakanj**  
**Kakanj-Info**

### **Napomene o radu Kolegija Općinskog vijeća**

U pripremi 38. redovne sjednice Općinskoga vijeća, Kolegij Općinskog vijeća je 21.02.2024. godine, održao sjednicu na kojoj je razmatrao:

**a) Obavijest o pokrenutoj inicijativi Općinskog vijeća Kakanj**

Kolegij je obavijest Stručne službe Skupštine ZDK o pokrenutoj inicijativi primio k znanju.

**b) Zahtjev MZ Varda za asfaltiranje dionice puta**

Zahtjev je Kolegij prosljedio Zavodu za planiranje i izgradnju na dalje razmatranje i postupanje.

**c) Zahtjev MZ Mramor za trajno rješavanje pristupnog puta**

Zahtjev je primljen k znanju.

**d) Odgovor Adriatic Metals BiH na dopise JP „Vodokom“ d.o.o. Kakanj**

Odgovor je prosljeđen Vodokomu da se o istom očituje i odgovor dostavi Kolegiju.

**e) Poziv kompanije Adriatic Metals BiH na svečano otvaranje rudnika Rupice Vareš**

Kolegij je zauzeo stav da se predsjedavajući Vijeća ne odazove pozivu.

**f) Obavijest JP „Grijanje“ d.o.o. Kakanj o utvrđivanju nove cijene toplotne energije od strane JP EP BiH d.d. Sarajevo**

Obavijest je primljena k znanju, uz stav da Grijanje u skladu sa svojim ovlastima poduzima dalje korake.

**g) Poziv Savjeta MZ Pope na obilazak lokaliteta „Stupe“ (MZ Pope) na kojem RMU „Kakanj“ planira proširenje rudarskih radova**

Poziv Savjeta MZ Pope je primljen k znanju.

**h) Zahtjev Savjeta MZ Kakanj II i MZ Pope za održavanje vanredne sjednice Općinskog vijeća na temu hitne obustave miniranja u „Kamenolom Greben“**

Kolegij je odlučio da se po pitanju predmetne problematike sazove vanredna sjednica Općinskog vijeća dana 29.02.2024. godine.

### **Usvajanje zapisnika sa 36. redovne sjednice Općinskog vijeća**

Nije bilo diskusije o zapisniku i isti je usvojen jednoglasno sa 24 glasa ZA.

### **Komentari na dostavljene odgovore na vijećnička pitanja**

**Armin Bašić:** je rekao da je dobio odgovor na pitanje u vezi problematike gradske zelene pijace, te je izrazio zadovoljstvo što se taj materijal nalazi na dnevnom redu sjednice. Također, pohvalio je rad općinskog pravobranioca i ocijenio kvalitetnim i profesionalnim sačinjeni izvještaj o predmetnoj problematici, kao i predložena rješenja.

### **Komentari na dostavljena mišljenja na vijećničke inicijative**

Nije bilo komentara na dostavljena mišljenja.

### **Vijećnička pitanja**

**Marcela Ravlija:** je postavila vijećničko pitanje u kojoj fazi su aktivnosti koje je Općina Kakanj poduzela u vezi proglašenja Trstionice novim zaštićenim područjem? Naglasila je da iz odgovora nadležne službe, na postavljeno vijećničko pitanje na prethodnoj sjednici na istu temu, očigledno da su obaveze koje su navedene u odgovoru Ministarstva za prostorno uređenje, promet i komunikacije i zaštitu okoline ZDK, u djelokrugu rada Općina i već više od pola godine je proteklo od kako je poslan zahtjev Službi za imovinsko-pravne, geodetske poslove i katastar nekretnina za utvrđivanje k.č. i k.o. područja prašume Trstionica.

**Sabit Čehajić:** je postavio vijećničko pitanje zašto na otvoreni konkurs JU „Dom zdravlja sa stacionarom“ Kakanj, raspisan krajem 2023. godine, na poziciji 10. i 11. (spremačica/radnica na održavanju čistoće) nije primljeno dijete šehida koje je predalo prijavu i ima uslove za zaposlenje u skladu sa Zakonom o dopunskim pravima boraca?

Predsjedavajući je konstatovao da su vijećnici: Dževdet Huskić, Adis Mrkonjić, Namir Talić, Amar Selimović i Adnan Čobo postavili vijećničko pitanje bez korištenja govornice.

**Dževdet Huskić:** je postavio dva vijećnička pitanja. Prvo je kolika su godišnja izdvajanja Općine Kakanj po pitanju naknada/taksi, te je tražio dostavu podataka koliko se izdvojilo u 2023. godini za 10 naknada/taksi Općine Kakanj? Drugo pitanje je da li je Omladinski centar na usluzi mladima i da li uopće radi, kao što je bilo dok su iste prostorije koristili mladi iz KICK-a? Naveo je da smatra da prostor Omladinskog centra nije iskorišten kao u ranijem periodu i da je uočljiv nedostatak sadržaja za djecu i mlade, pa se Omladinski centar danas koristi samo za poneki kurs. S tim u vezi je pozvao odgovorne da vrate Omladinski centar KICK-u, jer će koristiti od toga će imati čitava lokalna zajednica.

**Adis Mrkonjić:** je postavio vijećničko pitanje kada je planiran završetak sanacije puta Kakanj-Tršće, dionica prije tunela, uz napomenu da su izvršena nasipanja i izgradnja betonskog potpornog zida?

**Namir Talić:** je postavio vijećničko pitanje u kojoj fazi se nalazi projekat rekultivacije deponije Bijeke Vode i Brnj, uz napomenu da je RMU „Kakanj“ dužan rekultivirati zemljište i dovesti ga u stanje kakvo je bilo prije izvođenja radova u skladu sa Zakonom o rudarstvu?

**Amar Selimović:** je postavio dva vijećnička pitanja. Prvo pitanje je zašto je zatvorena pošta u Bilješevu u općini Kakanj, te traži iznalaženje rješenje da se navedena pošta što prije otvori jer je nužno potrebno stanovništvu tog područja? Drugo pitanje je da li je moguće od strane MUP-a uvesti u praksu izdavanje odgovarajuće vrste potvrde prilikom predavanja saobraćajne dozvole u PS Kakanj radi produžavanja registracije vozila?

**Adnan Čobo:** je postavio dva vijećnička pitanja. Prvo je da li Općina Kakanj iskazuje interes za željeznom konstrukcijom okna Stara jama, te da li postoje određene zamisli kako bi se isto moglo iskoristiti u smislu „simbola“ kada je u pitanju rudarstvo na području općine Kakanj? Drugo pitanje je hoće li Općina Kakanj poduzeti aktivnosti na organizaciji produženog boravka za učenike osnovnih škola (generacija I-III razred) i to za učenike koji imaju veliku potrebu za tim boravkom, tj. gdje su oba roditelja zaposlena, što trenutno nije rijedak slučaj u Kakanju?

## **Vijećničke inicijative**

**Armin Bašić:** je pokrenuo vijećničku inicijativu za veći angažman javnih medija putem javnog poziva što do sada nije bio slučaj. Obzirom da se sjednice Općinskog vijeća na televiziji emituju u tačno određenom terminu, te većina zaposlenih nije u mogućnosti pratiti iste, za razliku od portala koji „šeruju“ informacije i video materijal putem društvenih mreža koje su danas dostupne svima i u svakom momentu.

**Marcela Ravlija:** je pokrenula dvije vijećničke inicijative. Prva je za čišćenje korita rijeke Trstionice u Čatićima. Mišljenja je da je neophodno očistiti i urediti korito rijeke Trstionice u Čatićima radi prevencije poplava i oštećenja mostova u slučaju bujica, a imajući u vidu da je Programom sredstava za zaštitu okoline za 2024. godinu, planirano 55.000 KM za uređenje i rekonstrukciju korita i obala rijeka i potoka na području općine Kakanj. Druga inicijativa se odnosi na nabavku i ugradnju lifta u JU „Dom zdravlja sa stacionarom“ Kakanj. Smatra da dolazak ljekaru u Dom zdravlja predstavlja izazov za sve građane Kakanja zbog otežanog pristupa zgradi, nedostatka trotoara, kao i nedovoljnog broja parking mjesta u krugu Doma zdravlja. Navedeni problemi najviše pogađaju stara i iznemogla lica, teške bolesnike i invalidne osobe. S tim u vezi, a imajući u vidu da se na spratu objekta nalazi većina specijalističkih ordinacija (psiholog, neuropsihijatar, stomatolog, ginekolog...) predlaže, da se iznađe način za obezbjeđenje sredstava za nabavku i ugradnju lifta u kakanjskom Domu zdravlja.

**Vinka Aletović:** je pokrenula vijećničku inicijativu da Općinski načelnik i Komisija za ekologiju poduzmu aktivnosti vezano za porast zagađenja zraka na prostoru općine Kakanj koje bi podrazumjevale: zakazivanje i održavanje sjednica Komisije za ekologiju u kontinuitetu, iniciranje nabavke novih mjernih uređaja koji obuhvataju mjerenje koncentracije svih relevantnih polutanata u zraku, uključujući PM 2,5 i PM 10, transparento očitavanje i analiza u odnosu na referentne vrijednosti, poduzimanje mjera od strane zagađivača, pravovremeno izvještavanje građana.

**Adnan Čobo:** je pokrenuo dvije vijećničke inicijative. Prva inicijativa je da Općinski načelnik po hitnoj proceduri donese odluku o adekvatnom postupku ili nizu postupaka vezanih za okno – toranj na Staroj jami. U tom smislu predlaže da se obezbijede uslovi da se isti izmjesti i pozicionira na vrh brda Lisine kao znamenitost grada i turističku atrakciju u sklopu vidikovca na istom mjestu. Druga inicijativa je da se svim javnosti dostupnim internet portalima, registrovanim kao preduzeća ili kao udruženja građana, omogući prenos uživo sjednica Općinskog vijeća, te da im se isto plati iz Budžeta Općine Kakanj, po principu „Proporcionalno kvalitet/kvanititet plasmana informacije na području općine Kakanj“.

**Slaven Katičić:** je pokrenuo vijećničku inicijativu da se pokrenu aktivnosti na proglašenju javnog interesa, eksproprijacije zemljišta i izrade planske dokumentacije za legalizaciju dijela regionalne ceste R – 444a od Kakanja prema Varešu, uz napomenu da je navedeni dio puta od groblja u selu Klanac do granice općine Kakanj (Kopijari) probijen ratne 1992. godine, kako bi se spojile općine Kakanj i Vareš. Obzirom da put do danas nije legaliziran, a koristi se preko 30 godina i proglašen je dijelom regionalnog puta, inicijativom traži da se konačno riješi status tog puta.

Predsjedavajući je konstatovao da su vijećnici: Dževdet Huskić, Mediha Mamela, Branko Češljčić, Kenan Kozlo, Elvir Delibašić, Namir Talić, Adis Mrkonjić, Amar Selimović, Sabit Čehajić i Mujo Fafulić podnijeli inicijativu bez korištenja govornice.

**Dževdet Huskić:** je pokrenuo dvije vijećničke inicijative. Prva inicijativa se odnosi na obezbjeđivanje dodatnih sredstava za Centar za mentalno zdravlje pri Domu zdravlja Kakanj. Pozvao je Općinskog načelnika, direktora Doma zdravlja i Općinsko vijeće na hitno suočavanje s nekontrolisanom (zlo)upotrebom anksiolitika, hipnotika i antidepresiva, te traži da se obezbijede posebna sredstva u Budžetu za Centar za mentalno zdravlje pri Domu zdravlja Kakanj. Cilj inicijative je da se osiguraju dodatni resursi kako bi se sa više odlučnosti pristupilo ublažavanju tog ozbiljnog problema i kako bi se poduzele konkretne mjere za poboljšanje mentalnog zdravlja zajednice. Druga inicijativa je da se planira sanacija mosta na Crnoj rijeci poznatog kao „Most kod košpe“, jer je jedna strana mosta u jako lošem stanju, pri čemu je ograda raspuknuta, asfalt je urušen i potrebno je pod hitno poduzeti korake u smislu sanacije makar tog dijela mosta.

**Mediha Mamela:** je u ime Kluba vijećnika SDA pokrenula vijećničku inicijativu da se cjelokupna dokumentacija Komisije za etički kodeks Općinskog vijeća Kakanj (podnesena inicijativa, izjašnjenje

izabranog zvaničnika, izvještaj o provedenom postupku, akt o izrečenoj mjeri, te eventualno drugi dokazi), a vezano za predmet proveden za vijećnika-izabranog zvaničnika Češljic Branka, prosljedi prema Ministarstvu unutrašnjih poslova i Tužilaštvu Zeničko-dobojskog kantona radi eventualnog utvrđivanja drugih vrsta i oblika odgovornosti. Navodi da je od strane Općinskog vijeća i Komisije za etički kodeks utvrđena odgovornost vijećnika Naše stranke Češljic Branka za povrede i kršenje pravila Etičkog kodeksa za izabrane zvaničnike Općine Kakanj, za što mu je izrečena korektivna mjera „Javni ukor“, te traži da se kompletna dokumentacija u vezi predmetnog slučaja dostavi nadležnim organima radi eventualnog daljeg postupanja.

**Branko Češljic:** je pokrenuo vijećničku inicijativu da se na priključenju mjesnog puta iz naselja Tršće na regionalni put Kakanj – Tršće – Ponijeri ponovo postavi saobraćajni znak „Obavezno zaustavljanje – STOP“ na mjesto gdje je ranije bio, odnosno da se regulacija saobraćaja vrati u prvobitno stanje.

**Kenan Kozlo:** je pokrenuo dvije vijećničke inicijative. Prva je da se krene u zamjenu postojećih oblika usporivača brzine koji se trenutno koriste sa usporivačima tzv. uzdignuta ploha, kako bi se sa istim efektom usporenja prelazak vozila i vozača učinio ugodnijim. Umjesto dosadašnjih, postavljanje usporivača „uzdignuta ploha“ omogućilo bi vozačima i vozilima ugodniji i sigurniji prelazak, dok se istovremeno jasno signalizira da se mora usporiti brzina. Predložio je da se postavljanje tih usporivača prvobitno izvrši u urbanim dijelovima grada gdje postoji mogućnost, a na mjestima gdje je potrebno predlaže i obilježavanje pješačkog prelaza, naročito u blizini škola. Druga inicijativa je da se za djecu čiji roditelji/staratelji imaju skromna (minimalna) mjesečna primanja, obezbijede sredstva za besplatne ili jeftinije članarine u kakanjskim sportskim klubovima. Smatra da djeca baveći se sportom zdravo odrastaju, te im se pruža prilika da kroz igru uče da se život sastoji od pobjeda i poraza, ali da uvijek treba iznova pokušati i biti sve bolji.

**Elvir Delibašic:** je pokrenuo vijećničku inicijativu za izgradnju trotoara od benzinske pumpe „Delta Petrol“ do skretanja za naselje Slapnica.

**Namir Talić:** je pokrenuo vijećničku inicijativu da se u naselju Ivnica izmjene dotrajala rasvjetna tijela koja ne rade i da se postavi 5 novih rasvjetnih tijela na putu od raskrsnice puta Ivnica – Zlokuće, obzirom da se radi o frekventnom putu gdje je potrebno da se poveća sigurnost pješaka i vozača.

**Adis Mrkonjic:** je pokrenuo vijećničku inicijativu da se izvrši sanacija dijela puta na izlaznoj kapiji JU za predškolski odgoj i obrazovanje „Mladost“ Kakanj (kapija do PZU Intermed).

**Amar Selimovic:** je pokrenuo dvije vijećničke inicijative. Prva je da se postupi po Odgovoru Ministarstva za prostorno uređenje, promet i komunikacije ZDK na vijećničku inicijativu sa prethodne sjednice, odnosno da se pribave traženi podaci kako bi sve bilo prosljeđeno Ministarstvu unutrašnjih poslova ZDK na dalje postupanje. Druga inicijativa odnosi se na izmjenu i dopunu Odluke o komunalnim djelatnostima zajedničke komunalne potrošnje, na način da član 2. stav (5) Odluke glasi: „Obveznici čija mjesečna primanja ne prelaze iznos aktuelne minimalne penzije u Federaciji BiH“. Inicijativu je podnio iz razloga što je došlo do povećanja penzija, a zbog općeg poskupljenja životnog standarda, tako da su korisnici minimalne penzije ušli u obavezu plaćanja naknade. Na ovaj način bi bili opet oslobođeni plaćanja naknade.

**Sabit Čehajic:** je pokrenuo dvije vijećničke inicijative. Prva inicijativa je da se izvrši postavljanje (proširenje) rasvjete u naselju Laze u MZ Brnjic tj. ugradnja materijala i opreme koju su obezbijedili mještani naselja i MZ Brnjic, a radi se o 18 rasvjetnih tijela obezbjeđenih u 2023. godini. Druga inicijativa je da nadležna inspekcija izvrši kontrolu odlaganja medicinskog otpada u JU „Dom zdravlja sa stacionarom“ Kakanj. Smatra zabrinjavajućom činjenicu da se medicinski i obični otpad miješa u istim kontejnerima. U cilju sprečavanja neželjenih posljedica po građane Kaknja, a naročito za građane koji žive u blizini deponije pozvao je nadležne da utvrde način odlaganja medicinskog otpada, te izvrše provjeru da li se poštuje Pravilnik o upravljanju medicinskim otpadom u JU „Dom zdravlja sa stacionarom“ Kakanj.

**Mujo Fafulic:** je pokrenuo vijećničku inicijativu da se uvede željeznička linija Zenica – Ploče – Zenica, obzirom da trenutno postoji linija Sarajevo – Ploče – Sarajevo.

## **Utvrđivanje dnevnog reda**

Predsjedavajući je za 38. redovnu sjednicu predložio dnevni red koji je usaglašen na sjednici Kolegija, uz napomenu da je pristigao još jedan materijal od Službe za imovinskopravne, geodetske poslove i katastar nekretnina – „Prijedlog odluke o nabavci nekretnine“ i predložio je da se isti razmatra kao 4. tačka dnevnog reda.

U diskusiji po dnevnom redu je učestvovala Vinka Aletović.

**Vinka Aletović:** je predložila da se u dnevni red uvrsti tačka „Prijedlog odluke o potvrđivanju rezultata izbora i dodjeli mandata za članove Savjeta mjesne zajednice Željeznička Stanica“, napominjući da je rasprava po toj tački dnevnog reda obavljena, kao i da je usvojen Izvještaj Komisije o provedenim izborima za članove Savjeta mjesne zajednice Željeznička Stanica.

Predsjedavajući je dao na glasanje prijedlog vijećnice Aletović, a isti nije dobio potrebnu većinu sa 15 glasova ZA, bez glasova PROTIV i 11 glasova UZDRŽAN.

Nakon toga je jednoglasno sa 26 glasova ZA prihvaćen dnevni red koji je predložio predsjedavajući.

## **Usvojeni dnevni red**

1. Prijedlog odluke o izmjeni i dopuni Budžeta Općine Kakanj za 2024. godinu
2. Prijedlog odluke o izmjeni Odluke o utvrđivanju naziva ulica općine Kakanj
3. Prijedlog odluke o davanju na privremeno korištenje poslovnih prostora bez naknade
4. Prijedlog odluke o nabavci nekretnine
5. Prijedlog programa rasporeda sredstava za podsticaj razvoja poduzetništva i obrta za 2024. godinu
6. Prijedlog programa rasporeda sredstava za podsticaje u poljoprivredi za 2024. godinu
7. Davanje saglasnosti na Program rada i Finansijski plan JU „Gradska biblioteka“ Kakanj za 2024. godinu
8. Davanje saglasnosti na Finansijski plan JU za predškolski odgoj i obrazovanje „Mladost“ Kakanj za 2024. godinu
9. Davanje saglasnosti na Plan i program rada JU Centar za socijalni rad Kakanj sa Finansijskim planom za 2024. godinu
10. Razmatranje Informacije o stanju zaštite od požara i vatrogastva na području općine Kakanj u 2023. godini
11. Razmatranje Informacije o radu Udruženja „Razvojni centar općine Kakanj“ za period januar-decembar 2023. godine
12. Razmatranje Informacije o rješavanju problematike gradske zelene pijace

### **1. Prijedlog odluke o izmjeni i dopuni Budžeta Općine Kakanj za 2024. godinu**

**Predlagač:** Općinski načelnik

**Obrađivač:** Služba za finansije

**Izjestilac:** Džihad Berbić, pomoćnik općinskog načelnika

U diskusiji nije niko učestvovao i Vijeće je usvojilo Odluku o izmjeni i dopuni Budžeta Općine Kakanj za 2024. godinu, jednoglasno sa 26 glasova ZA.

### **2. Prijedlog odluke o izmjeni Odluke o utvrđivanju naziva ulica općine Kakanj**

**Predlagač:** Općinski načelnik

**Obrađivač:** Komisija za utvrđivanje kriterija, postupka, načina davanja i izmjene naziva ulica, trgova...

**Izjestilac:** Sedin Karahodžić, predsjednik Komisije

U diskusiji su učestvovali: Marcela Ravlija, Mediha Mamela, Armin Bašić, Dževdet Huskić, Slaven Katičić, Sabit Čehajić, Adnan Čobo i Safet Šahman.

**Marcela Ravlija:** je kazala da je članica Komisije za ljudska prava i ravnopravnost spolova i da je stav Komisije da su žene nepravedno zapostavljene u svim segmentima društvenog života, pa tako i prilikom dodjeljivanja naziva ulica. Uz to se osvrnula i na Inicijativu Mir sa ženskim licem od koje je potekla inicijativa da se 100 ulica nazove po 100 žena koje su u društvenom, kulturnom, naučnom i drugom smislu ostavile dubok trag u istoriji BiH i u tom smislu je rekla da je preporuka Komisije da se vodi računa o ravnomjernoj zastupljenosti oba spola, prilikom imenovanja ulica. Kazala je da je raduje što se namjerava jednoj ulici dati naziv 8. mart i da smatra da je taj naziv posvećen svim ženama, a ne samo ženama iz predmetne ulice, iako naziv ulice po prazniku ne može zamijeniti naziv po nekoj konkretnoj ženi.

**Mediha Mamela:** je naglasila da Klub SDA neće podržati predloženu izmjenu naziva ulice. Tačnije, podržat će se ideja da se neka ulica zove 8. mart, ali ne da se taj naziv daje ulici koja nosi naziv po komandantu 3. manevarskog bataljona Elvedinu-Dinku Šehagiću. Smatra da je Elvedin Šehagić ostavio dubok trag u ratnom periodu Kakanja braneci Kakanj i BiH u najtežim trenucima. Uz to je izrazila sumnju u vjerodostojnost potpisa koji se nalaze u prilogu peticije za izmjenu naziva ulice, jer ima informacije da pojedinci uopće ne znaju da se njihovi potpisi nalaze na listi.

**Armin Bašić:** je rekao da se nikome ne može nametati naziv ulice u kojoj živi i da bi stanovnici ulice trebali da se pitaju kada se nekoj ulici dodjeljuje naziv, uz dužno poštovanje prema Elvedinu Šehagiću i svim braniocima države. Rekao je da bi trebalo ispitati navode koje je iznijela vijećnica Mamela u pogledu vjerodostojnosti potpisa peticije i da bi se time trebali pozabaviti nadležni organi.

**Dževdet Huskić:** se složio sa vijećnikom Bašićem da se stanovnici trebaju pitati prilikom dodjele naziva ulica, jer se često dešava da se sve završi bez uključivanja građana. Navode vijećnice Mamela u vezi lažnih potpisa je ocijenio krajnje ozbiljnim, pa je mišljenja da u tim okolnostima nije dobro da Vijeće donosi odluku. Zbog toga je predložio da se usvoji zaključak o odgodi izjašnjenja po predmetnoj tački dnevnog reda, a da nadležna služba ispita i provjeri valjanost potpisa, naglasivši da bi volio podržati volju ljudi koji žive u toj ulici ukoliko stanje oko potpisa bude uredno.

**Slaven Katičić:** je rekao da nije prvi put da Vijeće ima sličnu situaciju kad se radi o izmjeni naziva ulice. Smatra da je ulica nazvana po nekome zato što je ta osoba to zaslužila i da se tim činom željelo dati priznanje i čast toj osobi, a sada bi se izmjenom naziva ulice toj istoj osobi oduzela ukazana čast. Uz razumijevanje volje građana da se ulica zove na određeni način, svu nastalu situaciju je ocijenio lošom praksom. Podsjetio je da je prilikom dodjele naziva ulicama na području općine Kakanj bila organizovana javna rasprava, pa u skladu s tim smatra da su građani tada trebali uzeti aktivniji angažman, te ne bi nastajale ovakve situacije. Pozvao je da se ubuduće prilikom predlaganja i dodjele naziva ulica povede računa da bi se izbjegle slične situacije.

**Sedin Karahodžić (odgovor):** je podsjetio da je Vijeće 2017. godine donijelo Odluku o utvrđivanju naziva ulica nakon što su provedene dvije javne rasprave s ciljem da se građani uključe u proces predlaganja i dodjele naziva ulica. Naglasio je da Komisija nema mandat da podnosi zahtjeve, već ona samo provodi proceduru kad zaprimi odgovarajući zahtjev i pripremi prijedlog akta za usvajanje Općinskom vijeću.

**Sabit Čehajić:** je predložio da se odgodi izjašnjenje po predloženoj odluci, a da se u svu situaciju uključi Savjet MZ kako bi do naredne sjednice Vijeća ovjerio potpise kao validne, a sve kako bi se podržala volja građana. Još je rekao da bi neku veću i značajniju ulicu trebalo nazvati po Elvedinu Šehagiću.

**Adnan Čobo:** je podsjetio da je Općinsko vijeće predstavnički organ vlasti i da su vijećnici birani od građana da odlučuju i donose odluke, a ne da se bave provjerom vjerodostojnosti potpisa i sličnim stvarima. Predloženu odluku je ocijenio jednostavnim aktom koji vijećnici treba da podrže ili ne podrže i tako pokažu moć odlučivanja zašto Vijeće kao predstavničko tijelo i služi.

**Safet Šahman:** je podnesenu inicijativu ocijenio sramnom, te je rekao da treba da bude stid svakoga ko podrži donošenje predložene odluke. Zapitao se da li treba da se kriju oni koji su branili državu, što je činio i Elvedin-Dinko Šehagić, te je rekao da ubuduće slične ideje, inicijative i prijedlozi ne bi trebali da dolaze na sjednice Vijeća.

**Armin Bašić (replika):** je pitao vijećnika Šahmana da li bi pristao da se ulica u mjestu gdje on živi zove 8. mart.

**Safet Šahman (replika):** je predložio rješenje nastale situacije na način da se prethodno neka druga ulica nazove po Elvedinu Šehagiću, pa nakon toga da se Vijeće izjasni o predmetnoj inicijativi za dodjelu naziva ulice 8. mart.

Nakon diskusije predsjedavajući je dao na glasanje prijedlog zaključka vijećnika Huskića i Čehajića o odgodi izjašnjenje po predloženoj odluci dok se ne izvrši provjera autentičnosti potpisa na peticiji, a prijedlog nije dobio potrebnu većinu sa 9 glasova ZA, 11 glasova PROTIV i 6 glasova UZDRŽAN. Potom se Vijeće izjasnilo o predloženoj odluci, te ista nije dobila potrebnu većinu sa 1 glas ZA, 14 glasova PROTIV i 11 glasova UZDRŽAN.

### **3. Prijedlog odluke o davanju na privremeno korištenje poslovnih prostora bez naknade**

**Predlagač:** Općinski načelnik

**Obradivač:** Službe za imovinskopravne, geodetske poslove i katastar nekretnina

**Izvjestilac:** Mukades Delibašić, pomoćnik općinskog načelnika

U diskusiji nije niko učestvovao i Vijeće je jednoglasno sa 24 glasa ZA usvojilo Odluku o davanju na privremeno korištenje poslovnih prostora bez naknade.

### **4. Prijedlog odluke o nabavci nekretnine**

**Predlagač:** Općinski načelnik

**Obradivač:** Službe za imovinskopravne, geodetske poslove i katastar nekretnina

**Izvjestilac:** Mukades Delibašić, pomoćnik općinskog načelnika

U diskusiji nije niko učestvovao i Vijeće je jednoglasno sa 24 glasa ZA usvojilo Odluku o nabavci nekretnine.

### **5. Prijedlog programa rasporeda sredstava za podsticaj razvoja poduzetništva i obrta za 2024. godinu**

**Predlagač:** Općinski načelnik

**Obradivač:** Služba za privredu, urbanizam i zaštitu okoline

**Izvjestilac:** Mirza Fazlić, pomoćnik općinskog načelnika

U diskusiji nije niko učestvovao i Vijeće je jednoglasno sa 24 glasa ZA usvojilo Program rasporeda sredstava za podsticaj razvoja poduzetništva i obrta za 2024. godinu.

### **6. Prijedlog programa rasporeda sredstava za podsticaje u poljoprivredi za 2024. godinu**

**Predlagač:** Općinski načelnik

**Obradivač:** Služba za privredu, urbanizam i zaštitu okoline

**Izvjestilac:** Mirza Fazlić, pomoćnik općinskog načelnika

U diskusiji nije niko učestvovao i Vijeće je jednoglasno sa 25 glasova ZA usvojilo Program rasporeda sredstava za podsticaje u poljoprivredi za 2024. godinu.

### **7. Davanje saglasnosti na Program rada i Finansijski plan JU „Gradska biblioteka“ Kakanj za 2024. godinu**

**Predlagač:** UO JU „Gradska biblioteka“ Kakanj

**Obradivač:** UO JU „Gradska biblioteka“ Kakanj

**Izvjestilac:** Senad Čišija, direktor JU i Sanda Hasagić-Terzić, predsjednica UO JU

U diskusiji je učestvovao Adnan Čobo.



**Adnan Čobo:** je rekao da ga raduju informacije o sadržajima koji se organizuju u Gradskoj biblioteci, pri čemu je naglasio da se u toj Ustanovi rađaju i umiru ideje, te je u tom smislu predložio da se direktor Ustanove obrati Vijeću sa par riječi.

Nakon diskusije Vijeće nije dalo saglasnost na Program rada i Finansijski plan JU „Gradska biblioteka“ Kakanj za 2024. godinu, sa 12 glasova ZA, bez glasova PROTIV i 13 glasova UZDRŽAN.

#### **8. Davanje saglasnosti na Finansijski plan JU za predškolski odgoj i obrazovanje „Mladost“ Kakanj za 2024. godinu**

**Predlagač:** UO JU „Mladost“ Kakanj

**Obradivač:** UO JU „Mladost“ Kakanj

**Izjestilac:** Azra Čišija, direktorica JU i Mirsada Čaluk, predsjednica UO JU

U diskusiji nije niko učestvovao i Vijeće je jednoglasno sa 24 glasa ZA usvojilo Zaključak o davanju saglasnosti na Finansijski plan JU za predškolski odgoj i obrazovanje „Mladost“ Kakanj za 2024. godinu.

#### **9. Davanje saglasnosti na Plan i program rada JU Centar za socijalni rad Kakanj sa Finansijskim planom za 2024. godinu**

**Predlagač:** UO JU „Centar za socijalni rad“ Kakanj

**Obradivač:** UO JU „Centar za socijalni rad“ Kakanj

**Izjestilac:** Fakir Ajdinović, direktor JU i Samir Husika, predsjednik UO JU

U diskusiji je učestvovao Slaven Katičić.

**Slaven Katičić:** je tražio da mu se odgovori koja je nacionalna struktura zaposlenik u Centru za socijalni rad.

**Fakir Ajdinović (odgovor):** je rekao da Ustanova zapošljava 15 radnika i da su svi Bošnjake nacionalnosti.

Nakon diskusije Vijeće je usvojilo Zaključak o davanju saglasnosti na Plan i program rada JU Centar za socijalni rad Kakanj sa Finansijskim planom za 2024. godinu, sa 20 glasova ZA, bez glasova PROTIV i 4 glasa UZDRŽAN, dok se vijećnik Ajdinović izuzeo od glasanja.

#### **10. Razmatranje Informacije o stanju zaštite od požara i vatrogastva na području općine Kakanj u 2023. godini**

**Predlagač:** Općinski načelnik

**Obradivač:** Služba civilne zaštite

**Izjestilac:** Nurudin Hrusto, pomoćnik općinskog načelnika

U diskusiji je učestvovao Dževdet Huskić.

**Dževdet Huskić:** je rekao da je evidentno opredjeljenje i Općine i Službe civilne zaštite da se PVJ Kakanj modernizuje kako bi bila spremna odgovoriti svim mogućim izazovima, što je za svaku pohvalu. Međutim, apelovao je da se putem Službe izvrši pritisak na inspeksijske organe kako bi se iste mjere provele u stambenim zgradama. Smatra da je potrebno izvršiti pritisak na stanare i upravitelje, a sve u cilju sveobuhvatne kontrole ispunjavanja minimalnih uslova po pitanju protivpožarne zaštite.

Nakon diskusije Vijeće je jednoglasno sa 24 glasa ZA usvojilo Zaključak o primanju k znanju Informacije o stanju zaštite od požara i vatrogastva na području općine Kakanj u 2023. godini.

## **11. Razmatranje Informacije o radu Udruženja „Razvojni centar općine Kakanj“ za period januar-decembar 2023. godine**

**Predlagač:** Udruženje „Razvojni centar općine Kakanj“

**Obrađivač:** Udruženje „Razvojni centar općine Kakanj“

**Izjavitelj:** Aldin Čatić, direktor Udruženja

U diskusiji je učestvovao Namir Talić.

**Namir Talić:** je pohvalio rad Udruženja i rekao da najviše zasluga za uspješan rad Udruženja treba pripisati direktoru Čatiću koji je unio dodatnu energiju u rad istog, što je za posljedicu imalo nove investicije i ulaganje novog kapitala u privredu. Nada se da će se nastaviti sa aktivnostima kao u prethodnom periodu.

Nakon diskusije Vijeće je usvojilo Zaključak o primanju k znanju Informacije o radu Udruženja „Razvojni centar općine Kakanj“ za period januar-decembar 2023. godine, sa 19 glasova ZA, bez glasova PROTIV i 4 glasa UZDRŽAN.

## **12. Razmatranje Informacije o rješavanju problematike gradske zelene pijace**

**Predlagač:** Općinski načelnik

**Obrađivač:** Službe za imovinskopravne, geodetske poslove i katastar nekretnina

**Izjavitelj:** Mukades Delibašić, pomoćnik općinskog načelnika

U diskusiji je učestvovao Armin Bašić.

**Armin Bašić:** je izrazio zadovoljstvo što se počela rješavati problematika gradske zelene pijace, pa je u tom smislu rekao da nije za opciju da se problem sa kupcem rješava putem suda, jer bi to bio dugotrajan proces koji bi usporio Općinu u smislu uređenja tog dijela grada. S toga je predložio zaključak da se sporazumno raskine ugovor o kupoprodaji sa kupcem „NOVA TRGOVINA-S“, da se izvrši povrat kupoprodajne cijene, ali da se ne vrši povrat uplaćenog iznosa na ime poraz na promet nepokretnosti, te da se Općini Kakanj izvrši povrat sredstava uplaćenih kupcu od strane Vodokoma na ime zakupa prostora zelene pijace.

Predsjedavajući je na prijedlog Općinskog načelnika dao pauzu od 10 minuta.

Nakon pauze Vijeće je glasalo o ponuđenim modalitetima rješavanja problematike gradske zelene pijace, te je jednoglasno sa 23 glasa ZA usvojilo Zaključak o sporazumnom raskidu Ugovora o kupoprodaji, zaključenog između TD „NOVA TRGOVINA-S“ d.o.o. Kakanj kao kupca i Općine Kakanj kao prodavca. Nakon toga je Vijeće jednoglasno sa 23 glasa ZA usvojilo Zaključak kojim se Informacija o rješavanju problematike gradske zelene pijace prima k znanju, te se ovlašćuje Općinski načelnik za zaključenje i potpisivanje notarski obrađenog sporazuma o raskidu Ugovora o kupoprodaji, broj: OPU:318/2017 od 14.12.2017. godine, zaključenog između TD „NOVA TRGOVINA-S“ d.o.o. Kakanj kao kupca i Općine Kakanj kao prodavca, u skladu sa uslovima i zahtjevima TD „NOVA TRGOVINA-S“ d.o.o. Kakanj, navedenim u Informaciji o rješavanju problematike gradske zelene pijace, broj: 02/1-1324/24 od 22.02.2024. godine.

Predsjedavajući je zaključio rad 38. redovne sjednice Općinskog vijeća u 13:50 h.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR  
OPĆINSKOG VIJEĆA**  
-po ovlaštenju-  
Emir Zaimović

**PREDSJEDAVAJUĆI  
OPĆINSKOG VIJEĆA**  
Slaven Katičić